

皇清經解續編

皇清經解彙編

皇清經解續編卷千八十二

南菁書院

今文尙書經說攷三

上

侯官陳喬樞樸園著

虞夏書十七 夏書一

禹貢第十七

今文尙書三

三之上

禹傳土

史記夏本紀禹乃遂與益后稷奉帝命命諸侯百姓興人徒以傳土○裴駟集解曰尙書傳字作敷馬融曰敷分也○司馬貞索隱曰大戴禮作傳土故此紀依之傳卽付也謂付工屬役之事令人分布理九州之土地也

禹敷土

漢書地理志堯遭洪水襄山襄陵天下分絕爲十二州使禹治之水土旣平更制九州列五服任土作貢曰禹敷土

案作傳者今文尙書也作敷者古文尙書也歐陽大小夏侯之學皆出於倪寬寬事歐陽生受今文尙書又受業孔安國故今尙書三家文字間有不同時亦兼存古字史據歐陽本班據夏侯本故與史記文字偶或有異也鄭君周禮大司樂注云禹治水傳土言其德能大中國也詩商頌長發禹敷下土方箋云禹敷下土正四方定諸夏廣大其境畋義與周禮注同是傳敷古今字之異耳僞孔傳於州十有二師云一州用三萬人功九州用二十七萬庸卽襲取史記興人徒語以爲之說也

隨山栳木奠高山大川

夏本紀隨山表木定高山大川○集解曰馬融云定其差秩祀禮所視也駟案尙書大傳曰高山大川五嶽四瀆之屬○索隱曰表木謂刊木立爲表記尙書作隨山刊木

地理志隨山栳木奠高山大川○師古曰栳古刊字奠定也言禹隨行山之形狀而刊斫其木以爲表記決水通道故高山大川各得安定也

案說文木部栳槎識从木夙闕夏書曰隨山栳木讀若刊篆文从𠂔許所引書作栳據古文也漢書引作栳栳卽栳之篆文三家今文用栳而訓義竝同史記以故訓代經文故云行山表木表卽槎識之義謂槎其木爲表識以表其

道也尙書正義引鄭注曰必隨州中之山而登之除木爲道以望觀所當治者則規其形而度其功焉訓誼與史記略同是古文今文師家竝無異說奠史記作定亦以故訓代經文也馬融云定其差秩卽據史記故訓之字爲說

尙書大傳曰高山大川五嶽四瀆之屬五嶽謂岱山霍山華山恒山嵩高也五嶽皆觸石而出雲扶寸而合不崇朝而雨天下江河淮濟爲四瀆大川相間小川相屬東歸於海五嶽視三公四瀆視諸侯其餘山川視伯小者視子男○鄭注云四指爲扶所視者謂其牲幣粢盛籩豆爵獻之數非謂尊卑釋名釋地曰山產也產生物也川穿也穿地而流也

冀州旣載壺口治梁及岐

夏本紀禹行自冀州始冀州旣載壺口治梁及岐○集解曰鄭元云兩河閒曰冀州地理志壺口在河東北屈縣之東南梁山在左馮翊夏陽岐山在右扶風美陽西北梁山西南○張守節正義曰括地志云壺口山在慈州吉昌縣西南五十里冀州境也梁山在同州韓城縣東南十九里岐山在岐州岐山縣東北十里二山雍州境也

地理志冀州旣載壺口治梁及岐○師古曰載始也冀州堯所都故禹治水自冀州始也壺口山在河東梁山在夏陽岐山在美陽卽今之岐州岐山縣箭括嶺也禹循山而西治眾水

案尙書正義引鄭君注云載之言事事謂作徒役也禹知

所當治水又知用徒之數則書之於策以告帝徵役而治之鄭君訓載爲作徒役之事卽史記所謂命諸侯百姓興人徒是也師古以載爲始非尙書本義陸氏釋文云載如字謂載於書也馬同鄭韋昭云載事也知古文今文家說略同正義又引鄭云於此言治梁及岐者蓋治水從下起以襄水害易也河從雍州經梁岐閒而流於冀疏其下流乃能承受上流之水故云治水從下起易爲功也

河東郡北屈云禹貢壺口在東南○應劭曰有南故稱北○臣瓚曰汲郡古文翟章救鄭至于南屈

左馮翊夏陽云禹貢梁山在西北

右扶風美陽云禹貢岐山在西北

案江聲云史記集解載鄭尙書注多引地理志鄭君所引之志今不可見其語與班史時有不合而覈諸後漢書郡國志則無不合後漢書志敘云推檢舊記先有地理則東漢別有地理志矣鄭君當東漢之末據其當代之書故不盡同班史之志司馬彪撰東漢之史必從東漢之志故郡國志郡縣之名悉與鄭注所引地理志合也

淮南子曰正中冀州曰中土

案楊士勛穀梁疏云冀州者天下之中唐虞夏殷皆都焉是天子之常居今攷漢書地理志河東郡平陽注應劭曰堯都也

爾雅釋地兩河閒曰冀州李巡注曰兩河閒其氣清厥性相

近故曰冀冀近也

案徐彥公羊疏引鄭尚書注云兩河閒曰冀州不書其畛者時帝都之使若廣大然王鳴盛曰以今輿地約之山西太原平陽汾州潞安蒲州澤州大同甯武朔平等府平定忻代保德解絳吉陽遼沁等州河南則懷慶彰德衛輝等府直隸則順天永平保定廣平順德宣化等府及眞定河閒之西北境東北則奉天錦州等府北則踰塞直抵陰山下西起東受降城之北東訖于大遼水皆冀州域也

曾旼曰按呂氏春秋云龍門未闢呂梁未鑿河出孟門之上大溢逆流無有邱陵高阜滅之名曰洪水大禹疏而通之謂之孟門按地理志謂壺口在北屈之東南而酈道元

水經注謂孟門在北屈之西南則壺口孟門之東山也龍門在梁山北則梁山龍門之南山也以是言之其先河出孟門之上橫流而出則知其東之壺口其南之梁山其西之岐山皆墊於水矣禹於壺口之西闢孟門而始事於壺口於梁山之北闢龍門而終事於梁山而其餘功又及岐山焉

胡渭禹貢錐指曰水經注云河水南逕北屈縣故城西有孟門山卽龍門之上口也實爲黃河之巨阨此石經始禹鑿河中激廣夾岸崇深傾崖返捍巨石臨危若墜復倚其中水流交衝鼓若山騰濬波頽疊於下口又水經河水南出龍門口注云昔大禹導河積石疏決梁山謂斯處也卽

經所謂龍門矣魏土地記曰梁山北有龍門山大禹所鑿
通孟津河口廣八十步巖際鐫迹遺功尙存水經又云河
水又南逕梁山原東山在夏陽縣西臨於河上渭按梁山
之崩壅河則俯瞰河流可知信爲禹鑿之餘所稱呂梁卽
此山之別名矣詩大雅云弈弈梁山惟禹甸之傳曰甸治
也禹治梁山除水害箋曰梁山之野堯時俱遭洪水禹甸
之者決除其災使成平田定貢賦於天子渭按此言正可
以發治梁及岐之故蓋洪水方割自孟門大溢而西入鄜
延之境汜濫而南注于渭勢若建瓴平田皆爲巨浸其受
患者梁西岐東數百里之地故壺口事畢遂西治梁蓋自
龍門治西河南至於華陰所謂決川距海也治梁之餘因

而及岐蓋決渭之下流入於河兼治梁山之野使可耕作
所謂濬畎澮距川也

劉熙釋名釋州國曰冀州亦取地以爲名也其地有險有易
帝王所都亂則冀治弱則冀強荒則冀豐也州注也郡國所
仰注也

案釋名釋冀州之取義蓋本於尚書今文家解詁也

水經山澤篇梁山在馮翊夏陽縣西北河上岐山在扶風美
陽縣西北

既修太原至于嶽陽

夏本紀既修太原至于嶽陽○索隱曰嶽太嶽卽冀州之鎮
霍大山也按地理志霍太山在河東斄縣東○正義曰括地

志云霍山在沁州沁原縣西七十八里

地理志既脩太原至于嶽陽○師古曰太原卽今之晉陽是也嶽陽在太原西南

太原郡云在晉陽屬并州晉陽故詩唐國○臣瓚曰所謂唐今河東永安是也

河東郡毘云霍大山在東冀州山○應劭曰毘順帝改曰永安

安

案尙書釋文云岳字又作嶽今據史記漢書皆作嶽字從今文也岳古文嶽見說文水經汾水注云汾水南過永安縣西故毘縣也又東與毘水合出東北太岳山禹貢所謂岳陽卽霍太山矣山有岳廟

又案此禹道汾水入河之事也地理志太原郡汾陽云北

山汾水所出西南至汾陰入河過郡二行千三百四十里

冀州寢水經注云汾水出太原汾陽縣管涔山東南流逕

晉陽縣東晉水從縣東南流注之地理志晉陽云晉水所

出東入汾是也

山海經曰管涔之山汾水出焉西流注于河淮南子曰汾出燕京燕京亦管涔之異

名也汾水又南逕大陵縣東迤左爲鄔澤地理志鄔縣云九

澤在北是爲昭餘祁并州藪是也汾水又南逕永安縣西

與彘水合又南逕霍城東又南霍水入焉水出霍太山西

南流注于汾又南逕臨汾縣東屈從縣南西流至汾陰縣

北西注于河此汾水所經之道也史記云禹鑿龍門通大

夏大夏卽太原也杜預春秋釋例曰晉大鹵太原大夏參

虛晉陽一地六名曾畋曰大原汾水之所出岳陽汾水之所經修太原至岳陽道汾水也葉夢得曰傳言禹能修鰮之功則鰮功不皆廢也蓋有因而修之者焉鰮惟知治太原而不知道壺口以及梁岐此功所以不成故禹必先事壺口梁岐而後修鰮之舊迹自太原以至岳陽也胡渭曰左傳子產曰昔金天有裔子曰昧爲元冥師生允格臺駘臺駘能業其官宣汾洮障大澤以處太原帝用嘉之封諸汾川然則汾洮之待治自古有然矣

楊雄冀州箴曰岳陽是都

案岳陽就霍大山之南言之據揚雄箴則堯都平陽亦岳陽也閻若璩云陽字所包者廣蓋旣修太原二句直舉一

千餘里用功而言也

劉熙釋名釋地曰廣平曰原原元也如元氣廣大也

案此卽禹貢大原之訓誼當本於三家尙書章句也

覃懷底績至于衡漳

夏本紀覃懷致功至于衡漳○集解曰鄭元云懷縣屬河內
○索隱曰按河內有懷縣今驗地無名覃者蓋覃懷二字或
當時共爲一地之名也○正義曰括地志云故懷城在懷州
武陵縣西十一里衡漳水在瀛州東北百二十五里平舒縣
界也

地理志覃懷底績至于衡章○師古曰覃懷近河地名也底
致也績功也衡章謂章水橫流而入河也言禹於覃懷致功